



La radunanza generala da la CRR, l'antecessura da la SRG.R, l'onn 1989 a Razén.

FOTO PETER DE JOUNG

Happy Birthday SRG.R

75 onns e sauna e robusta sco adina – La societad purtadra da RTR, la SRG.R che ha gì num enfin avant paucs onns Cuminanza Radio Rumantsch è vegnida fundada avant precis trais quarts tschientaner. La SRG.R festivescha quest giubileum cun trais occurrenzas a Mustér, Savognin e Schlarigna. La FMR ha discurrì cun Vincent Augustin, il president actual da la SRG.R, davart la vegliadetgna da 75 onns, il giubileum e las sfidas futuras.

MARTIN GABRIEL/FMR

In giubileum – trais festas – a Mustér, Savognin e Schlarigna. Cun quella purschida festivescha la SRG.R il 75avel onn d'existenza. E sa chapescha che la varianta decentrala è er intenziunada per reparter il publicum en consequenza dal coronavirus. La FMR ha discurrì cun Vincent Augustin.

FMR: En l'invit per il giubileum scrivais Vos: «Il temp passa ed i va cun tuttas e tuts tuttina – nus vegnin pli vegls». Ha la SRG.R da batter cun sintoms da vegliadetgna?

Vincent Augustin: Na! Igl è dentant uschia che la societad n'è betg pli quella dals onns 1940 e 50. Quai che constat è che la media da vegliadetgna da nossas commembras e noss commembers è plitost in zic pli auta.

La SRG.R accumpogna fitg stretgamain l'operativa. Pli fitg forsà che autras societads purtadras. È quai mo l'impressiun ch'ins ha?

Jau crai che nossa relaziun cun il manaschi, cunzunt cun la direziun, cun schurnalistas e schurnalists e la tecnica, saja sumeglianta sco tar las autras trais societads SRG.D, SSR.R e CORSI – quai ch'è er previs en ils statuts da

la SRG SSR. La differenza è natiralmain che SRF è in manaschi blier pli grond che RTR.

L'anteriura CRR ed oz SRG.R ha era adina giugà ina rolla impurtanta entaifer il cussegl d'administraziun da la SSR. Tge rolla gioga la SRG.R oz en quest gremi?

Mintga president da las quatter societads purtadras fa part dal cussegl d'administraziun da la SRG SSR, che sa cumpona da total nov persunas – tranter quellas trais dunnas; tuttas nov persunas han ils medems dretgs.

Las societads purtadras dalla SSR han numerus gremis – quant impurtants enquels gremis, sco per exempel in cussegl dal publicum per la funcziunalitad da l'operativa?

La structura da l'entira SRG SSR è in zic cumplexa, dentant resplenda quai la Svizra quadrilingua ed er la Svizra democratica. Ord vista da la controlla dal program è il Cussegl dal public fitg impurtant, er sche la publicitad fa strusch stim da sia lavur, quai ch'jau deploresch fitg.

Nus vegnin pli vegls – jau vuless reprender anc ina giada Voss plets en l'invitaziun a las festivals – co vai vinavant cun la SRG.R?

Impurtant è che nus possian mantegnair nosa quantitad da commembers da circa 1000 persunas. Quai pretenda da far gronds sforzs per regiuvinar nosa societad, per exempel cun acziuns ensem cun la Giuventetgna Rumantscha (GiuRu).

Vus festivals il giubileum cun trais occurrenzas cun publicum vaccinà – tgi è envidà?

In e scadina è cordialmain envidà, independentamain d'ina commembranza. Per raschun da la pandemia valan las restricziuns cun certificat da vaccinaziun, da guarizium u in attest d'antigens u da PCR.

Dapli informaziuns da la SRG ed il program da festa: srg.ch

Presidents da la SRG.R

1946 – 1951	Robert Ganzoni
1951 – 1959	Tista Murk
1959 – 1968	Christian Badraun
1968 – 1984	Stefan Sonder
1984 – 1996	Fidel Caviezel
1996 – 2005	Luregn Mathias Cavely
2006 – 2013	Duri Bezzola
2013 – 2019	Oscar Knapp
2019 – oz	Vincent Augustin

Terms en l'istorgia da la SRG.R

La SRG.R è vegnida fundada ils 12 d'october 1946 sco «Pro Radio Rumantsch». Già 1947 han ins midà quest num en Cuminanza Radio Rumantsch (CRR) e 1957 e il num vegni amplifitgà tar Cuminanza Rumantscha Radio e Televisiun. La midada dal num en SRG.R è succedida l'onn 2007.

Avanzament e structuradas

La fundaziun 1946 è vegnida promovida fermamain da Jakob Job (1891–1973), il director dal Radio Studio Zürich oriund dal Grischun, e dals exponents da las uniuns culturalas rumantschas. Ils intents primars da la nova uniu eran: La commembranza a la SRG SSR (cuntanschida il 1954) e dapli emissiuns rumantschas. 1964 hai dà ina restructuraziun gronda da la SRG/ SSR e la CRR è vegnida integrada en la regiun da la Svizra tudestga da la SSR. Il 1968 han ins obtegni la concessiun per emissiuns da televisiun rumantschas, ed il 1975 è vegni creà entaifer la CRR il ressort Televisiun Rumantscha (TvR). L'onn 1979 ha la CRR cuntanschì in status specific entaifer la SSR. Il dretg status d'ina societad regiunala



La suprastanza actuala (da san.) Roger Tuor, Ladina Simonelli-Zisler, Vincent Augustin, Elena Luzio e Gion Lechmann.

FOTO MOMIR CAVAIC

(unitad d'interpresa autonoma) è dentant vegni concedì pir il 1991. Anno 1995 hai dà in ulteriur pass en direziun autonomia: La Televisiun Rumantscha è vegnida separada da las structuradas organisatoricas da la Televisiun Svizra SRF. L'onn 2006 fa RTR midada dalla Via dal teater en il nov edificì a la Via Masans 2. La midada dal num CRR en SRG.R è succedida l'onn 2007 a basa d'ina revisiun totala dals statuts. Il nov num è ì en vigur l'onn 2009.

L'onn 2018 vegn a restar a la SRG.R en buna memoria pervi dal cumbat da votaziun «No Billag». Cun grond engaschi han suprastanza e cummissiuns da la SRG.R cumbatì l'aboliziun da las taxas da radio e televisiun. 2021 festivescha la SRG.R ses giubileum da 75 onns cun ina festa a Mustér, Savognin e Schlarigna. (fmr/mg)

fontaunas: lexicon istoric retic ed srg.r